

**REGIONAL NEWS BULLETIN  
HEADLINES (EVENING)**

**Date – 11/01/2025**

**Time - 18:30 Hrs**

1. Sap Missionary te'n chanchintha hril tura Mizoram leilung an rawn rah champha vawi 131-na Missionary Day vawiinah urhsun taka hman a ni.
2. Mizoram sorkarin nikum atanga petrol leh diesel atanga chhiah a tihpun hnuah Cheng Nuai 452, Sing 3, Sang 2, 600 a hmu tawh.
3. Union Home Minister Amit Shah-a chuan ramchhunga ruihhlo hluar zel do turin sawrkar laipui leh state sawrkar ten theihtawp an chhuah a tul a ti
4. Los Angeles khawpui kang nasa tak avangin mi 11 an thi tawh.

<><><>

**MISSIONARY DAY**

Sap Missionary pahnih Pu Buanga (Rev J.H. Lorrain) leh Sapupa (Rev F.W. Savidge) te'n chanchintha hril tura Mizo leilung an rawn luh champha vawi 131-na Missionary Day vawiin hi urhsun taka hman a ni.

Kum 1894 khan sap missionary pahnihte hian khatihlaia 'Lushai country'-a chanchintha hril turin an rawn lut a. January ni 11 hian lawnglengin Sairang an rawn lut a ni. He ni hi Mizoram sorkar chuan sorkar pisa leh zirna in zawng zawng chawlh ni-ah a puang thin a ni.

Missionary Day hi Baptist Kohhran Baptist Church of Mizoram chuan ropui leh urhsun takin an lawm a. BCM Kohhran hrang hrangah thupui intawm "Lalpan thil ropui tak min tihsak a" tih hmangin sermon ngaihtlak a ni a, tlai lamah kohhran hrang hrang ten ruai an theh bawk.

BCM General Secretary Rev. R. Lalbiakliana chuan, Missionary Day chu Zofaten Chanchin Tha an dawn avang leh Chanchin Tha avanga Chhandamna leh malsawmna an dawn te hre thar chung, Pathian hnena lawmthu sawina hun atan hmang turin Kohhran hote a chah a ni.

Mizoram Synod tarlan danin January ni 11, 1894 hi Mizoram Presbyterian Kohhran chuan an kohhran din ni atan a pawm thung a, kum 2018 atang khan Mizoram Presbyterian Kohhran din tan ni angin an hmang a ni.

Presbyterian Kohhran hrang hrangah Chawhma leh zan hun atan programme duan a ni a, hei hi tualchhung Kohhranin an remchan dan angin hun an hmang mai thin a ni.

Kuminah hian chawhma lam thupui atan, 'Chanchin Tha leh Kohhran' tih hman a ni a. Zan lam thupui atan 'Hei leh chen hi Lalpan min pui a ni' tih hman a ni bawk.

Tukin khan Zarkawta Missionary-te hriatrengna lungdawh-ah Missionary Day pual hian hun hman a ni a, Missionary Day puala hun hmanah hian Zarkawt Presbyterian kohhran mi bakah BCM leh Salvation Army atangin mi thahnem tak an kal khawm a ni.

**CYMA**

Central YMA chuan nikum December ni 28 leh kumin January ni 10 inkarah ruihhlo thahnem tak an man a, a kaihnhawihah mi 47 man an ni bawk.

Central YMA Kumpulan thuchhuah tarlan danin December ni 28 leh kumin January ni 10 inkarah No 4 Hawng - 7, an man a Tictac bur – 65 man in Chlonozepam tablet 12 an man a, heng bakah hian Ganja kg 18 leh gram 72 leh Trama tablet 5430 bakah Nap-10 tablet 10 an man bawk.

Thuchhuah tarlan danin ruihhlo kaihnhawihah hian mi 47 man an ni a, Home ah leh De-Addiction Center ah mi 3 dah luh niin Excise & Narcotics Dept. ah mi 9 hlan an ni bawk.

<><><>

**CESS**

Mizoram sorkarin nikum September Ni 1 atanga petrol leh diesel man atanga chhiah a tihpun atangin, December thla thleng khan Road Maintenance cess leh Social Infrastructure & Services cess atangin Cheng Nuai 452, Sing 3, Sang 2, 600 a hmu tawh.

Taxation, Finance department chuan nikum August ni 30-a hriattirna a tihchhuah-ah petrol leh diesel-ah litre khat zelah Social Infrastructure & Services cess Cheng 2 leh Road Maintenance cess Cheng 2 lak a nih tur thu a chhuah hnuahn chhiah

hi lak tan a ni a, October thla chhung hian Cheng Nuai 16,48,352 hmuh a ni a, November thla bik ah cheng Nuai 426,50,312 a ni a, November thlaa chhiah lut a tam chhan hi October thla khan khawl lamah fel lo a awm avangin petrol dealer ten pawisa an thun theih loh avang a nih thu Taxation, Finance Department lam hotute chuan an sawi a ni. December thla khan Road Maintenance Cess leh Social Infrastructure & Services cess atangin Nuai 9, Sing 3 Sang 3,936 hmuh a ni.

Tuialhthei mana chhiah lak hi sorkar chuan Road Maintenance cess chu kawng atan liau liau hman a nih tur thu an lo sawi tawh a, social infrastructure & Services cess chu zirna in tihchangtlunna atan te, hriselna kaihnawihha hman atan te, skill development leh hmeichhia te chawikanna atana hman tur a nih thu a sawi bawk a ni.

<><><>

#### **GHY HC CJ**

Justice Vijay Bishnoi, Gauhati High Court a Chief Justice leh Mizoram State Legal Services Authority-a Patron-in-Chief chuan Jail tangten kut themthiamna chher sak an nih theih nan hmalakna kalpui anih thu a sawi.

Gauhati High Court a Chief Justice hian vawiin khan District Jail Lawngtlai-a Special Campaign for Old Prisoners & Terminally ill Prisoner & Skill Development buatsaih a hmanpui a, he Campaign hi Mizoram State Legal Services Authority buatsaih niin Chief Justice chuan Jail tang ten hriselna tha tak an neih theih nan theihtawp chhuah reng a ni a ti a, a thlawnin an hriselna endik sak leh enkawl ngai a thlawna enkawl an nih dan sawiin damdawi ngaihtuhsak thlengin tih thin ani a ti a, Jail tangten kut themthiamna an neih theih nan hmalakna kalpui a nih thu sawiin rintlak leh hmantlak thiamna an neih theih nan Jail tangte theihtawp an chhuah tul thu a sawi bawk.

Justice Vijay Bishnoi chuan Jail tangte hman tur Mistiri bungrua a pe a, Jail tangten an thil siam hrang hrang, an mahni tlawhtute chu an hlan bawk.

<><><>

#### **MISTIC**

Mizoram Science, Technology & Innovation Council Governing Body chu an chairman Pu Lalduhoma, Chief Minister hovin nimin khan CM Conference Room ah an thukhawm a.

Meeting hian Mizoram state Intellectual Property Right Policy te, Science, Technology & Innovation Policy chungchang te leh an inrelbawlina thil pawimawh dang te a sawiho a ni.

Chief Scientific Officer, Member Secretary, (MISTIC)Pu H. Lalsawmliana, chuan tun hnaia an hmasawna leh hmachhawp an neih tlangpuite tarlangin MISTIC hian Research & Development (R&D) hmalakna hnuaiiah nikum khan Lungleiah Science Centre leh Planetarium an hawng a, Khawzawla KVK hmunah Solar Cold Storage, Ton 10 dah theihna, Aizawl atanga control theih an bun a, 4-Color Web Offset Press, Phunchawngah hawn mai theihin an peih tawh a. Mizoram Biotechnology Centre, MINECO ah an sa mek a, Selinga Food Testing Lab tihchangtlun hna an thawk bawk a ni.

Innovation Facility Centre hmalaknain Innovation Promotion hmun engemawzatah an kalpui a. Workshop te, training leh exhibition te, Innovator meet te an buatsaih a. Innovator te an tanpui a, intihsiakna te leh Industry tlawhna hun te pawh an buatsaih thin tih a tarlang a, Patent Information Centre hnuaiiah an hmalakna atangin Intellectual Property Right; patent 5, trademark 20, geographical indications 5, copyright 9 leh design 1 pawmsak an ni tawh a. Climate Change Knowledge Management hmalakna te, Technology deployment te, Science lam chawi larna te, Institution leh Human capacity building lam hmalakna te an kalpui bawk.

<><><>

#### **SIALHAWK PINEAPPLE**

Khawzawl District Sialhawk khuaa Lakhuihthei chingtute chuan nikum khan Lakhuihthei Quintal 13,000 vel an thar chhuak a, an lakhuihthei thar chhuah atang hian Quintal 9,000 vel hralh chhuakin Quintal 4,000 vel chu hralhna tur an hriat loh avangin a tawihral a ni. Sialhawk khuaah hian kum 2005 vel atang khan Lakhuihthei hi chin tan a ni a, kum 2016 khan khawtlang angin an buaipui tan a, tunah hian chhungkaw 250 velin an ching mek a. Nikum lamah hralhna lamah an buai bakah tuna an thar chhuah lai mek te pawh a hralhna turah buaina an tawh chhoh zel avangin chhungkaw engemaw zat chuan kuminah hian Lakhuihthei chin hi bansan an rilruk tih an sawi a ni. Kan corr report lo ngaithla ang.

(Sialhawk khuaah hian Lakhuihthei ching hi chhungkaw 250 vel an awm a. Lakhuihthei chingtute hnen atanga thu dawn danin, nikum hmasa 2023 khan Lakhuihthei hralhna tur Mizoram Sawrkarin a ngaihtuahpui avangin Lakhuihthei

Quintal 12,000 vel an hralh chhuak thei a. Nikum 2024 khan Sawrkar lam atangin a hralh chhuahna kawngah puihna an hmuh loh avangin anmahni in an theih angin Market an inzawn a, Quintal 9,000 vel hralhna tur an hmuh lain Quintal 4,000 vel chu hralhna tur an hriat loh avangin a tawihral a ni. Lakhuihthei hi chawh rualin Kg.1 Rs.10/- in an hralh ang a ni a, nikum khan Rs. 90,00,000/- vel an lei lain Rs.40, 00,000/- man vel a tawihral thung a ni. )

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar hi puan leh a ni ang.

<><><>

#### **UNION HOME MINISTER**

Union Home Minister Amit Shah-a chuan ramchhunga ruihhlo hluar zel do turin sawrkar laipui leh state sawrkar ten theihtawp an chhuah a tul a ti. Drug Trafficking leh National Security chungchang inkhawmpuiah he thu hi sawiin Pu Shaha chuan kum 2024 kalta chhungin ruihhlo cheng vaibelchhe singkhat sang ruk leh zakaw hu ramchhungah man a ni a ti a. India ram ropuia siam tur chuan ruihhlo nuai bo a ngai tih sawin sawrkar laipui leh state sawrkarten inthuruala theihtawp an chhuah a ngai a ni a ti. Union Home Minister chuan kum 10 kalta chhungin ruihhlo kg nuai 24 dawn ramchhungah man a ni tih tarlangin ruihhlo an tihchhiat pawh cheng vaibelchhe sing nga sang 6 leh 800 chuang hu a ni a ti bawk.

Vawiin inkhawmpuiah hian Union Home Minister hian Drug Disposal fortnight a hawng a, MANAS-2 helpline state leh UT zawng zawnga pawhsei tur a hawng bawk a ni.

<><><>

#### **LA FIRE**

Los Angeles khawpui kang nasa tak avangin mi 11 an thi tawh a. Tualchhung thuneitute chhut danin he kangmei chhuakah hian in leh lo sing khat leh sang thum chuang a kang chhe tawh a. Mi nuai 1 chuang hmun himah an chhuak tawh niin Sheriff department chuan an sawi a. Tun dinhmunah ramkang hi nasa tak takin hmun li ah a thleng mek a. Santa Monica leh Malibu inkara Palisades kang chu nasa berin nimin thleng khan zaa 8 bawr vel thelh a ni tawh a. Khawpui chhak lamah Eaton Fire chu zaa 3 vel thelh tawh a ni a. Heng kangmei pahnihte hi California chanchina a rapthlak zual panga zingah an lang tawh a ni.

<><><>

#### **COLOMBIA AIRCRAFT CRASHED**

Colombia-a thlawhna chesualah mi 10 an thi. Vanduaina thlenna hmun hi Colombia hmarthlang lamah a ni a. Pacifica Travel enkawl thlawhna chu Urrao thingtlang khaw bulah a tla a. Thlawhna khalhtu mi pahnih leh mi chuang 8 te an thi ani..

<><><>